

Headline	Perkampungan Orang Asli Sungai Ruil kini berubah wajah		
MediaTitle	Mingguan Malaysia		
Date	28 Aug 2016	Language	Malay
Circulation	171,663	Readership	563,000
Section	Dlm Negeri	Page No	3
ArticleSize	139 cm ²	Journalist	N/A
PR Value	RM 6,186		



Perkampungan Orang Asli Sungai Ruil kini berubah wajah

CAMERON HIGHLANDS 27 Ogos - Selepas lima tahun tragedi banjir lumpur dan tanah runtuh melanda Perkampungan Orang Asli Sungai Ruil di sini, projek penempatan semula bagi penduduk kaum Semai di tapak tersebut, kini telah berubah wajah.

Perdana Menteri, Datuk Seri Najib Tun Razak hari ini meluangkan masa kira-kira 20 minit bagi meninjau pembinaan 152 perumahan jenis berkembar dan lima rumah komuniti di atas tanah seluas 26.3 hektar yang telah disiapkan pada 31 Januari lalu.

Menurut Najib, sebanyak RM50 juta peruntukan untuk membangunkan perkampungan moden tersebut yang dilengkapi kemudahan terkini, telah dibentangkan pada 2012.

"Saya berasa amat bangga kerana semua keluarga yang terlibat dalam

nahas tersebut, kini hidup dalam keadaan rumah moden cukup sempurna sekali gus membuka masa depan yang meyakinkan," katanya.

Beliau berkata demikian ketika ditemui pemberita selepas menghadiri program majlis ramah mesra di perkampungan Orang Asli berkenaan yang turut dihadiri oleh Menteri Besar, Datuk Seri Adnan Yaakob.

Projek penempatan semula tersebut yang diletakkan di bawah Pusingan Perancangan (Rolling Plan) Kedua bagi Rancangan Malaysia Ke-10 (RMK-10), merupakan susulan tragedi pada 7 Ogos 2011 meragut tujuh nyawa sementara dua lagi cedera parah serta meranapkan enam buah rumah.

Perkampungan asal yang dahulunya hanya mempunyai 75 buah rumah, kini dilengkapi kemudahan dwan serbaguna, surau, tadika, wakaf, tandas awam, rumah sampah,

bangunan Tenaga Nasional Berhad (TNB), rumah pam, menara tangki air dan tujuh unit gerai bagi memberi peluang kepada penduduk untuk menjalankan aktiviti ekonomi.

Penduduk mula menduduki kawasan penempatan baharu itu bermula 30 Mei lalu.

Dalam pada itu, Najib berkata, projek penempatan semula itu mengambil kira konsep pembangunan lestari dengan meminimumkan kerja-kerja pemotongan tanah bagi menjaga alam sekitar.

Sementara itu, Tok Batin Perkampungan Orang Asli Sungai Ruil, Kadir Ah San berkata, pihaknya amat berterima kasih kepada Najib yang meluluskan peruntukan pembinaan penempatan semula itu selepas lebih tiga tahun mereka hidup menumpang sementara di Brinchang.